

12. maj

UPA 2016/128

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa siunnersuisoqatigiiffiup Issittumi Siunnersuisoqatigiinnut alaatsinaatsutut inissisimalernissaanik qinnuteqaataanik tapersersueqqullugit.
(Nunat Avannarliit Killiit Siunnersuisoqatigiiffiata aallartitaa)

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutaa, tassalu siunnersuisoqatigiiffiup Issittumi Siunnersuisoqatigiinnut alaatsinaatsutut inissisimalernissamik qinnuteqaataanut Naalakkersuisut tapersiissuteqarnissaanik siunnersuut Siumumiit taperseratsigu matumani oqaatigissavarput.

Nunarsuarmioqatigiit issittumi pissutsinut annertusigaluttuinnartumik soqutiginninnerat arajutsisimannginnatsigu Siumumiit oqaatigissavarput, taamaattumillu Nunat Avannarliit Killiit matumani aamma annertunerusumik malinnaanissamik sunniuteqaqaatanissamillu siunniussaqaqarnerat Siumumiit ilalerumavarput. Allatut oqaatigalugu: Nunat Avannarliit Killiit Siunnersuisoqatigiiffiat Issittumi Siunnersuisoqatigiinni naalakkersuinikkut suleqatigiittoqarneranut pitsaanerusumik ilisimatineqarsinnaalissaaq.

Nunat Avannarliit Killiit Siunnersuisoqatigiiffiata Issittumi Siunnersuisoqatigiinni alaatsinaatsutut inissisimalernissaa piviusungussappat nunanut taakkununga alloriarneq pingaarutilik pissaaq, taamaalillunilu apeqqutit issittumi tunngassutillit nunat taakkua pingasuusut susassaqaqfigisaat qanimit malinnaavigineqarsinnaangussallutik.

Taamatut Siumumiit naatsumik oqaaseqarluta siunnersuut taamak isikkoqartillugu taperserparput.

Anders Olsen,
Siumut